

1 Pita

Pita letawa bautaa sumanailala mampo girumalena

¹ Ne Pita Iesu Keriso aposeliwa dea, me ne waaubanena. Ne leta ema e God apanawaida ware rua bola Pontus, Galasia, Kapadosia, Asia ita Bitinia bedeuwointa wainile leilana manlawo girumantedina. ² Mamamba God e mapoido meba insaisawa rua atenlene sonabalen, ita Aleu kakaiwa mukawa mampe e God apanawaida kakaibu wanaiten. Me e sonablena e Iesu Keriso aiawa etane ruawaitana baiwa, ita do me e kadila Iesu osinawa mampe mitepiaubepia baiwa.

God amonawa euwa ita wanwan euda obasa e manlawo debamalepi, niapo!

God inaida nenena baiwa wadaposisanta!

³ No Tatamba Iesu Keriso Mamba no Godimba wadaposisanta! God no nuaparembaidalene ina sanaa neneno bedewe munten. God Iesu Keriso bo bedewe inasano enenwisena baiwa no ina sanaa sa wadate bedewe wainitana. Ita ema baiwa no tauma insaisamba dima winakasalala bedewe ituitana. ⁴ Tane sa ipa dima God e baila uboo imaaasana winakasalala winede, ita mai ando kadilepi ba lawosalepie dialepi, dia. ⁵ E mida sumanai bedewe wainilana God meba mukawa mampe gonaaledie oniadewasaledia, ideita inaida walama ompa osowe iedia sabamolepio bedewe aitana.

⁶ Walama ema kerauda os bedewe e God insaisawa rua nuaparetilana rubu pokawa daitada

bedewe. Tane ideita God dima e baila uboo imaazano winedia baiwa nuaeuitonuna! ⁷ Dima baiwa e rubu pokawa daitada eteilana? Poka sa e sumanaila ipawaida rubusadie eueuwa osowe itudie ewede. Eueuwa ema wapo insena: Gold ipa diala, tane ia bedewe supuo ipie mirawa nosepituwapi ipawaida sabamolepia baiwa. Epe rua deawaa, e sumanaila do poka bedewe rubu osowe itupie ewepi. Tane e sumanaila ipa nitu uwatauwa eudida, mai gold rua. E sumanaila ipawanalepia e ando Iesu Keriso sabamolepia walamae e ebo debama ita wadapos sapawa euda wadana. ⁸ Iesu Keriso ibuwa e ewasiala, tane e me nuawadawadasailana. Meida e mai eweipona, tane ideita sumanaiwaitilana. Ita e nuae sapawaida bedewe nuaeuitilana, nuae sa umanawa no mai wataa rua. ⁹ E poka eteile bedewe nuaeuitilana, ipawa e ando inaida bedewe odane aitana, sa ipa e sumanaila Iesu Keriso bedewe ituilana ipawaida.

¹⁰ Inaida bumpa ema umanawa peroweta tontau deaitopa ewane banusaie ipawaida donsapona baiwa. Ita mo God amonawa euwa e enalepona benemawanton. ¹¹ Tane Aleu kakaiwa mo bedeuwo wandia mukawa mampe Keriso poka etepie ita ema aupe sapawaida wadepia umanawa bauta benemanton. Mo dima Keriso Aleupa kakaiwa waeuwamodio ando walama dainea ita inainamba ambi segalepia donsapona baiwa banusaie. ¹² Tauma God Aleu kakaiwa wanaubeno wisena mukawa mampe Gagalo euda amonantoiено e etalana. Gagalo euda sa umanawa peroweta tontau mapo benemawan-

toie. Tane God euwamon mo nolau sa ipa mai muba baibu, tane e baila. Ensel do menamodia inaida dewawa uduudu atentopona, tane mai atentopua rua, dia.

God wandia rua dodomana os wanlempa!

¹³ God e inaida ema enalena baiwa insaisala imaanune dodomana os wanlempa ita eba onioniadewaitonuna. Iesu Keriso sabamolepie wisepia walama osowe sau amonawa euda enalepi. Sa baiwa e insaisala dodomana amona euda me e enalepia bedewe itununa. ¹⁴ God aiawa os ruawaitonuna, tane mai mapo wankoaitile ewanuauitilana dewawa dewasane aitana, dia. ¹⁵ E tauma dewa uduudu bedewe dodomana os kakaiwaida wanlempa, ipawa God e sonabalene apalena me ipa dodomana kakaiwaida. ¹⁶ ✧Buka bedewe girumalena wadi wadiase,

“Dodomana kakaiwaida wanlempa, ipawa ne ipa dodomana kakaiwaida.”

¹⁷ God ando apana uduudu mo dima dewasaiena rua kotumopi. Me mai apana inainamba dainea, debama ba kerauda, umanawa waipona, dia. God ema mampe e rauparitile wailanase, “Mako God.” Me ipa e Mamalaida, sa baiwa e tawo ema osowe ware rua wainile leilana bedewe God dauwa etonune sawaitonune wanlempa. ¹⁸⁻¹⁹ E ema atendewaitena baiwa deaitopa wanlempa. Mapo e wanwan ipasiawaia e atatala wadaisaieno manlawo wisena bedewe wainile. Inse nadewaitana, God e mai nitu diala gold ba silwa

✧ **1:16:** Liwai 19.2

mampe inalepona, dia. Tane God Keriso osinawa uwatauwaida mampe e malesalene inalen. Iesu Keriso ipa sip sanaa eudida pulontoia rua e baila bolene osinawa memenauben. ²⁰ God tawo segasia walamawe Keriso insaisawalene sonabena tauma e baila walama ompa osowe sabamosano wisen. ²¹ Iesu Keriso mampee e God sumanaiwaitilana, me mida Iesu bo bedewe inasane sapaida wanena. Sa baiwa e sumanaila ita insaisala uduudu God bedewe ituile wainilana.

²² E ulaipa gagalowa etale ruawaitena baiwa e kadila uduudu mitamone eulen ita sumanai sosola do ulaipa mampe nuawadawadaitilana. Tane tauma ideita nuala uduudu mampe eda nuawadawadaitonuna. ²³ Epe dewaitonuna, ipawa e God aiawa inawaa winakasalala mampe inaida sanaa bedewe muiten. Tane inaida sa bumpa ipa God aiawa lawuru naumba winakasalala rua, mai diala. ²⁴ Ne ema epe wadina, ipawa buka bedewe girumalene wadi wadiase,

“Apana uduudu ipa ina ande inintoia rua, ita mo euwau ipa dobina beraniwa kelowa rua. Ina ita beran kelowa walama kerauda os winei ita ema aupe rorontopue diantopu. ²⁵ Tane God aiawa ipa winakasalala.”

Tane God aiawa, sa ipa Gagalo euda e manlawo amonantoie.

2

¹ E Gagalo euda bedewe ina sanaa donsalana baiwa kadi uduudu otawiaitane nambemona. Laga uduudu, asowawa dewawa, obun ita do

aia kadiwa uduudu eidamona! ²⁻³ [◊]E Tatamba dauwa etale ateiten me ipa eudida e manlawo. Sa baiwa oto gegela ama kewa wadia rua e epe aleu nanawa euda kewa wanune ita God aiawa sa mampe inaida sanaa bedewe muitane debamaitana.

⁴ E Tatamba Iesu mampe wilene sumanaiwaitilana. Me ipa du wadawada seuwaida rua. Apana me ewanadabuasaiena, tane God emawe me ipa sonabalala uwatauwa eudida. ⁵ Sa baiwa e do du seuwa eubu ruau e eba etela God wanana me duwaida, sa ipa me ekelesiawa du rua wadepia baiwa. Ema bedewe e God pirisiwaida kakaibu wanaitane ita aleu amonawa daitada eubu Iesu Keriso bedewe God wanana. Pulo ema ipa God menasadia rua. ⁶ E epe dewaitana, ipawa buka bedewe girumalena God wadi wadiase,

“Ewana, ne seu bola Saion bedewe itudina.

Seu sa ne sonabene ituna ipa eudida du awanepiposidepia ruawa. Mida me bedewe sumanaileidia ando mai malalepi, dia. Tane sumanaiwa ipawaida ideita wadepi, mai di sumanaileipona, dia.”

⁷ E mida sumanaitilana manlawo seu ema ipa uwatauwa eudida, tane mo mida sumanaisiawaia mampo seu ema ipasia. No ema epe atenten, ipawa buka bedewe girumalene wadi wadiase,

“Du wadawada apanawa seu dea ewanadabuasaiena. Tane seu sa ipa eudida uduudu bedeuwo ita du awanepiposidepia rua.”

⁸ Ita buka bedewe do wadi wadiase,
“Seu ema ipa apava bagoramopio omepu.”

[◊] 2:2-3: Sam 34.8

Mo Gagalo euda mai etape ruawantopona, sa baiwa bagoramodio omei. Ema bedewe dima God bauta insaisawalene ituna mo mampo segaleide.

⁹ [✡]Tane e ipa God sonabalena apanawa, e warere ionoidoa pirisiwi ita God apanawaida kakaibu segaitene wainilana. E dubawa bedewe wankoaitilano God apaleno dubawa ele me sapawa eudida bedewe nolen. Ita me e sonabalena me dewawa euda benemawaitana baiwa. ¹⁰ Mapo e mai God apanawa, dia, tane tauma e God apanawaida wainilana. Mapo God nuaparewa e baila mai dauwa etape ateitapona, dia. Tane tauma e God nuaparewa etale atenidaiten.

¹¹ Nuana sosowa, e tawo osowe ware rua wanriasaitile leilana. Sa baiwa ne e badowa wadewasaledina ete ewanuauwa kadiwa dewawa mai dewasana, eidasana! Ipawa ete ewanuauwa dewawa ema aleu insaisawa onawa dewaleidie amboitusade. ¹² E sumanaisiawaia apanawa bedeuwo wanwan euda dodomana wanlempa. Ita apana sa dewa kadiwa wawuwa e di wawulempa, mo e dewala euda ewapue atenidantopue ita God me wiwisa walamawe wadaposisapu.

Onialeia apanawa aiau ruawaitonuna!

¹³ E Tatamba Iesu bedewe sumanaitena baiwa apana debamau muka wadeiena dima waia ruawaitonuna. E warere ionoidoa mida bauta muka wadena ¹⁴ ita do me nolawa sauwa apana aiau etonuna. Ipawa warere me sauwa

^{✡ 2:9:} Ekisod 19.5,6; Ekisod 19.5; Diutor 7.6; Taitus 2.14; Aisaia 9.2

apanawa waaubamona nolauwonolauwo de-wasampa. Mida kadi dewalala mo matangelamompa ita mida euda dewalala ebou wadaposisampa. ¹⁵ E dewala eubu os dewamono apava wankoalala ewapue mo gagalou kadiwa rebareba waia epu. E epe dewaitonuna, sa ipa God insaisawa rua. ¹⁶ Mai nitu da, ba apava da me meba insaisawa mampe e taudolepi, dia. Tane mai insenase, “Tauma mai dima da ne taudoneipona, di wankoantedina kadiwa dewasapaa rua.” Sa dia, tane God insaisawa e taudolempo wanlempa. ¹⁷ Apava uduudu wiwira mampe auwadewasamonuna. Sumanai sosola nuawadawadamonuna. God sawaitane ita warere e onialedia do wiwirawaitonuna.

¹⁸ Nola dewalala, e debamala onialeia aiau ruawaitana. Mai debamala euda ita e insaisala dosaie nolantoia os simbiamonuna, tane debamala e oniakadisaleia do simbiamonuna. ¹⁹ E di poka saiwa etonune mai sigabuitana, ipawa e God insaisawaitilana baiwa. Sa ipa euda God emawe. ²⁰ E kadiwa dewasapona baiwa mo e epaleipona tane e mai sigabuitapona, sa ipa mai asowawa da wineipona, dia. Tane e dewa euda dewasaipona mo e di poka enaleipona e mai sigabuitapona, sa ipa eudida God emawe. ²¹ Poka epe rua etonuna baiwa God e apalen, ipawa Keriso do e baila poka eten. Ema bedewe me eueuwa ituna e ruawaitane wawe aitana baiwa.

²² [☆]Me mai kadiwa da dewasapona, ba laga da me moawe nosepona, dia. ²³ [☆]Apava Keriso wareuwasane wakadisasaieno me mai leusape

wapona. Me poka etedie mai onau sipoasapia umanawa wapona, diaida. Tane me insaisawa uduudu God, mida dodomana os me baiwa enepie kotulepia, bedewe itun. ²⁴ [◊]Keriso me meba etepa mampe no kadiwamba koros iawa osowe awanenauben. Dima baiwa? No kadi mampe bobopa segantate etaiate dodomanaida wantaa baiwa me bolen. Me epeiena pokawa sa bedewe e inaiten. ²⁵ Bauta e sipsip rebalala ruau inta koasale deaaiten. Tane tauma e gamo onionialala mambuida mampe leuitene wilén. Me ipa e oniadewasalepia rua.

3

Apana nainailala gagalou

¹⁻² [◊]Nola dewalala mo apanau debamau baibu nolantoia aiau ruawantoia rua deawaa e ioto babadala aiau ruawaitonuna. E epe dewaitonuno e bedelawo isiwa babadala Gagalo euda mai ruawantoipona e wanwanla eubu dodomana God sawaitilana ewapue Keriso bedewe sumaintopu. Inta ema bedewe e mai God aiawa mo diamopona, tane eueuwala euda baiwa sumaintopu.

³ [◊]E ioto mai ete benawa, uwala taumoilana, gold kibokiborala, ba gara eubuida taumoilana mampe etela benasane eusana. ⁴ Tane e bedelawo nua bibia ita nuae daina mampe simbiaitonuna, sa ipa ete benawa winakasalala eudida. Wanwan ema ipa uwatauwaida God emawe. ⁵ Ne epe wadina, ipawa mapo ioto God sawantioe

[◊] **2:24:** Aisaia 53.5,6 [◊] **3:1-2:** Epesus 5.22; Kolosi 3.18 [◊] **3:3:**
1 Timoti 2.9

insaisau badowa me mampe ituie do babadau aiau ruawantoie, ita dewa ema mampe etepu benasaie. ⁶ ◊Sara ema epe dewalen, me badawa Abraam aiawa etene ruawalene me ebowa wane wanase, ‘Debamana.’ E Sara dewawa euda ruawaitonune ita sumanaila bedewe mai dima da sawaitonuna. E epe dewaitonuna e ipa Sara obampa wainilana.

⁷ ◊Tane gagalo deawaa ne e apana mona do dialedina. E sosola iwoa mo ipa oauarau, mai e eba ruala. Sa baiwa mo insaisau wadonune deaitopa wiwira mampe mo do wanlempa. Ne epe dialedina, ipawa inaida amonawa euda God mo do wanamono wadeiena. E rauparila dima enabodasapia sawa epe dewaitonuna.

Dewa euda baiwa poka etonune mai etedabuitana!

⁸ Ne gagalonaa diasapaa baiwantedine awodeasadine ema epe wadina: E insaisala dea os mampe sosola do etaetaitonune wanlempa. Sumanai sosola do eda nuawadawadaitonune ita nuala bibia wanlempa, mai eba itupositana, dia. ⁹ Apana mida dewa kadiwa e manlawo dewasampo mai leusane sipoasana. Mida wareuwalempo mai leusane wareuwamona, tane mo osouwo God sauwa euda ituna. God e do sau euda wadana baiwa apaleno me mampe wilien.

¹⁰ ◊Epe dewaitonuna, ipawa buka bedewe girumalena ema epe wadi wadiase,
“Apana mida wanwan euda ita walama euda wadompaa menasadia me ideita aia

◊ **3:6:** Bumpai 18.12 ◊ **3:7:** Epesus 5.25; Kolosi 3.19 ◊ **3:10:** Sam 34.12-16

kadiwa mai wapi, ita laga me moawe mai nosepi, dia. ¹¹ Me dewa kadiwa adiananasapie euda dewasapi, ita wanwan euda obasa sosowa do waimompaa baiwa nuawa uduudu mampe nolalempa. ¹² Ipawa apama mida dodomana os dewasaia Tatamba emawa ipa mo osouwo, ita do mo raupariu me etede. Tane apama kadiwa dewalala Tatamba mo adiananamode.”

¹³ E nuala uduudu mampe euda dodomana de-wasanuna mai mida da e manlawo kadiwa de-wasapia rua. ¹⁴ [✡]Tane dewa euda dewasailana baiwa apama e kadilempo, e ideita nuaeuitonuna! Mai mo sauitane ita nuala pola wapi, dia! ¹⁵ Tane Tatamba Keriso nuala bedeweidosane me wiwirawaitonuna. Ita apama da e waitaralepie wapiase, “Dima baiwa e insaisala Keriso bedewe ituilana?” Epe waitaralepia sawa walama uduudu imaaitonune wanlempa dima e ateitene sumanaiwaitilana ipawa sabamo waeuwamona. Tane wiwira mampe gagaloitana mai apama nuau empi, dia. ¹⁶ Do dodomana os wanlempa mai dima e nuala wawusampa. E Keriso wawe aiti-lana baiwa apama e wakadisalepu, tane e wan-wanla dodomana euda ewapue aia kadiwa waia malawantopue epu. ¹⁷ Naita e God insaisawa rua dewala euda baiwa poka etonuna, sa bedewe euwa winede. Tane e dewala kadiwa baiwa poka etonuna, sa mai ide.

¹⁸ Ne ema epe wadina, ipawa Keriso do kadi baiwa walama dea os deasane poka eten. Me ipa

[✡] **3:14:** Matiu 5.10

apana dodomanaida, tane kadi dewalala baibu bolen. Ema bedewe me e banlalepio God mampe wilena. Keriso eteida wandio bosaiena, tane God me inasano enenwisene aleu gonaawa bedewe wandie ¹⁹ alene aleu diburalala mampo Gagalo euda amonalen. ²⁰ ✲ Aleu ipa sa mida Noa waa debama wadedia walamawe God nua aiaisiwa mampe oniamodie tane mo mai me aiawa ruawantopona, dia. Tane waa sa Noa wadena bedewe ipa apuna wisia 8 os odane inantoiena. Esa apuna isiwa awanamon, tane esa ipa sa deawaa apuna waa bedewe waimoia inamon. ²¹ Esa Noa waawa awanene inasana, sa ipa babatutu e tauma inaledia eueuwa. Babatutu esawa mai ete onapea mirawa mitepiaubepia baiwa, dia. Tane babatutu bedewe no God iririsaitana no bedemba mirawa mitepiaubepio mai dima da wawunepi. God Iesu Keriso bo bedewe inasano enenwisena baiwa God no do babatutu bedewe inanede. ²² Keriso bo bedewe enenwisene aupe uboo odene alene God witapa on deneuve aisiden wain. Ensel ita uboo wanwanlala mukamukaua uduudu ipa me atowe.

4

Wanwan euda gagalowa

¹ Ema insena, Keriso ete mampe poka etena baiwa e do Keriso insaisawa rua deawaa poka etaetawa baiwa imaaitonune wanlempa. Ne ema epe wasauledina, ipawa apuna mida ete mampe poka etena me kadiwa dewawa enien.

✉ 3:20: Bumpai 6.1-7.24

² Me tauma ita ando tawo osowe wandia walamae mai ete ewanuaauwa asiisi alepi, dia, tane God os insaisawa bedewe waimpa. ³ E sumanaisiawaia apanawa dewau rua dewasaila walama debama di diasalana. E wanwanla rebareba sa bedewe kadiwa daitada, ete ewanuaauwa ita nana narebasalala dewawa dewasaila wainile. Do esa badowa naile ita kokoitau God emaue nuadabualalaida sumanaibuitile simbi-amoile. ⁴ Tane tauma e mai duba apanawa do deaitipe mo dewau kadiwa rebarebaida do dewasaipona, dia. Sa baiwa e dewala leusalana mampe mo memesantone e wakadisalei. ⁵ Tane mo God, mida apava inawaa ita bolala kotumopia baiwa imaaleidie wandia, me danawe enapue dima dewasaiena umanawa diapu. ⁶ Sa baiwa Gagalo euda do apava bolala mampo benemalen. Mo ete mampe matangela wadeiena apava uduudu eteiena rua. Tane Gagalo euda mo mampo amonalena mo aleu gonaawa bedewe inawaa wampua baiwa God inawaa wandia rua.

God amonawa euda oniadewasa gagalowa

⁷ Dews uduudu walamau ompa ipa maidalen. Sa baiwa insaisala dodomana ita eba ewonunadewae do wanlempa raupari baiwa. ⁸ Gagalo ema debamawaida, insenune wanlempa: E sumanailala eda nuawadawadaitonuna, ipawa nuawadawada kadi uaraia rupumodie nanaumode. ⁹ Do eda sau mampe sosola banlamonuno dulawo odompa, mai sigabuitana. ¹⁰ Sumanailala deadea God mo amonau daitada me nolawa baiwa wanamon. Onionia apanawa euda rua God

amonawa e wadalana mampe eda sauitonune simbiaitonuna. ¹¹ Me mida Gagalo euda amonaleidia insepidewalepie me God aiawaida wapi. Me mida simbia nolawa dewasadia, me ideita mukawa God wanedia mampe nolalepi. Dewa ema uduudu segantompo God ebowa Iesu Keriso bedewe wadaposisampa.

Tane Iesu Keriso mampe sapaida ita muka debama do winakasalepi! Ulaipa, amen.

Keriso baiwa poka etonuna!

¹² Nuana sosowa, poka rubuwa debama e manlawo wisempo mai memesaitane saitana, ewaewa nitu da etasiala e manlawo segalempaa rua. ¹³ Tane Keriso poka etena rua e do poka eteilana baiwa nuaeuitana! Ita Iesu Keriso me sapawaida do segalepia walamawe e nuala nuaeue nopelepi. ¹⁴ Apana e Keriso ebowa baiwa wakadisalempa e nuaeuitonuna, ipawa ema sabamosadie euwalede God Aleupa kakaiwa sapawaida do e osolawo wande. ¹⁵ Tane mai mida e bedelawo sowa bosapi, poilepi, kadiwa rebareba dewasapi, ba sowa gagalowa wampe walamawa di diasampa. Mai mida epe dewalepie poka etepi. ¹⁶ Mida Kerisolala wanalena baiwa poka etompa mai poka sa malawalepi, dia. Tane me Keriso ebowa wadena baiwa ideita God auwasapi.

¹⁷ Tauma walama wisen God me meba apanawaida mampo kotu uwaalepia baiwaleide. God no sumanailala do tauma kotunede, ema mampe no atenten mo mida God Gagalowa euda mai sumanaiwantoipe ruawantoipona

ando matangela badowaida wadapu. ¹⁸ Ema epe segalepia, ipawa buka bedewe girumalena wadi wadiase,

“Apala eubu dodomanau inaida donsapua intawa awa mo mampo badokadileide. Tane sa bedewe kadi dewalala God mai sawantoipona inaida ambi donsapu?”

¹⁹ Sa baiwa me mida God insaisawa rua poka etedia God mida me dewasana ita oniadewasasadia bedewe insaisawa itumpa ita ideita dewa euda os dewasampa.

5

Ekelesia onioniawa gagalowa

¹ Ne do ekelesia oniamodina apanawa tauma gagalo ema e onialeia apanawa mampo wadina. Ne emanawo Keriso poka etena ewana. Ita me sapawaida ando sabamolempo ne do sape. Sa baiwa ne wasauledina. ² [✡]Sipsip onioniau apanawa euda rua e God apanawa e enalena oniadewasamonuna. Mai apala da e dialena baiwa nola sa dewasana, dia, tane insaisala uduudu mampe nolaitana God menasadia rua. Mai mane insene baiwa nolaitana, tane nuala uduudu menasadia baiwa simbiaitana. ³ Mo mida God e witalawomona mai aia mukama mampe oniamona, tane e eueuwala euda mampe dewasane banlamona. ⁴ Tane ekelesia onioniawa ionoidoa Keriso sabamolepia walamawe e uwala benawa uwatauwa eudida wadana. Sa ipa sapaida unewa winakasalala, ando mai dialepi, dia.

[✡] 5:2: Ion 21.15-17

5 Tane do e apama sanaau mida e onialeia aiau etane ruawaitana. Mai mida e bedelawo ituposi insaisawa wadepi, tane simbia mampe eda sauitonuna. Ipawa buka bedewe girumalena wadi wadiase,

“God apama asowawala enabodamode, tane me amonawa euwa apama mida insaisawa daina obasa mampe simbiasadia wanede.”

6 **◊**Sa baiwa e eba keraitane God mukawa atoweitana ita God walama itudiawo e wadaposilepi. **7** Dima e menaledio nuala pola wadia uduudu God mampesana, ipawa me e insaledie umanala Wade.

8 Insaisa dodomana mampe ewonunadewae wanlempa. Pue mukawaa laion nana banuwa awa aleidie aiawa wadia rua deawaa e emala woala apanawa Seitan apama banubu awa aleidie mo wadamopie kadimopia baiwa. **9** Poka etonune sumanai bedewe badowa enane kadi mamba enabodasanuna. Epe dewaitonune ateitena e sumanai sosola bola uduudu bedewe waimoia poka e eteilana rua deawaa etei.

10 Tawo ema osowe wainilana bedewe e walama kerauda os bedewe poka eteilana. **God e nuapare mampe amonawa euda enalene ita e apalena poka ema aupe Keriso do me sapawaida bedewe waina.** Keriso meba e tanlawolepie muka enalepio badowaida enakasaitana. **11** Mamamba God mampe muka debamaia ande ita ando winakasalepi. Ne epe menanede, amen.

Auwa gagalowa

◊ 5:6: Matiu 23.12; Luk 14.11; 18.14

12 ☩Ne sona Sailas mida ne sumanaiwantedina sauwa mampe ne gagalona kampaida ema girumantedina e manlawo. Ne wasauna gagalowa ema enaledina ita do benemantedina God nuawadawadawa amonawa euda ne umanawa wadina ulaipa dauwaida ne etana. God amonawa ema bedewe badowa enonuna! **13** ☩No mida God e do sonabanena bola Babilon bedewe wainitana e auwaleitana. Ne otona Mak do e auwalede. **14** E sumanai sosola do eda nuawadawada mampe auwaitonuna.

E mida Keriso bedewe wainilana deaitopa wanlempa, niapo!

✩ **5:12:** Aposel 15.22,40 ✩ **5:13:** Aposel 12.12,25; 13.13;
15.37-39; Kolosi 4.10; Pailim 1.24

Ina Sanaa Gagalowa
The New Testament in the Kanasi Language of Papua
New Guinea
Nupela Testamen long tokples Kanasi long Niugini
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files
dated 9 Oct 2020

b27bd40e-e091-5268-bcbf-8232e1d7501a